

Jika Trump menang pilihan raya, semakin lamalah perang dagang - Tun Mahathir
AstroAwani
03 November 2019
Najib Aroff,

BANGKOK: Perang dagang melibatkan dua gergasi ekonomi dunia, Amerika Syarikat dan China dijangka berlarutan sekiranya Presiden Amerika Syarikat (AS) Donald Trump sekali lagi dipilih menjadi Presiden pada pilihan raya Presiden AS 2020 nanti, kata Perdana Menteri.

“Setakat ini kita tidak nampak ia (perang dagang) akan berakhir namun ia akan berubah jika Donald Trump tidak dilantik semula (menjadi Presiden).

“Jika beliau dilantik semula (sebagai Presiden) mungkin kita akan saksikan perang dagang berlanjutan selama lima tahun lagi,” kata Tun Dr Mahathir Mohamad kepada media selepas Sidang Kemuncak ASEAN-China di Bangkok, Thailand.

Tambah Dr Mahathir, China turut menyuarakan kebimbangan dan mahu perang dagang dihentikan.

“Kesemua pemimpin ASEAN turut bersetuju perang dagang harus dihentikan kerana ia menjejaskan pertumbuhan ekonomi.

“Mereka mahukan dunia yang aman,” katanya.

Sementara itu menurut seorang pegawai kerajaan yang turut hadir pada Sidang Kemuncak ASEAN-China, Dr Mahathir turut menyeru China untuk mencari penyelesaian secara baik bagi menghentikan ketidaktentuan ekonomi.

Pada Jun 2018, Trump mengenakan tarif dan halangan dagangan lain ke atas barangan China bagi memaksa negara 'tembok besar' itu menghentikan “amalan dagangan tidak adil” susulan lambakan produk murah dari China.

China pula mengambil tindakan balas dengan mengenakan tarif yang sama terhadap import AS.

Pada 1 November lepas Pertubuhan Perdagangan Dunia (WTO) memberikan lampu hijau kepada China untuk mengenakan sekatan bernilai AS\$3.6 bilion terhadap barangan AS.

© 2019 AstroAwani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/jika-trump-menang-pilihan-roya-semakin-lamalah-perang-dagang-tun-mahathir-221659>